

公文

大總統親授前大總統大勳位證書

蓋聞赤松綠圖古有尊崇之典紅鷹金鷄今多投贈之文實惟前大總統孫文艱難卅載奔走五洲提挈華夏之羣豪蹤躡美法之盛軌遂建共和基礎鑿造民國規模本大總統依勳位令第一條親授大勳位以彰殊績無前偉業挽歷代慘黷之風對天鴻休登斯民太平之世此證

大總統親授黎副總統大勳位證書

蓋聞旂常紀績交龍光炳乎日星圭瓚策勳召虎名高於江漢惟茂庸之卓著斯榮典之先頒副總統黎元洪威振鷹揚休徵虎變建上流之旗鼓作鎮荆襄復大漢之衣冠澄清華夏佐開基之景命宜絕席以崇褒本大總統依勳位令第一條親授大勳位以彰殊績受茲元祉符丹書鐵券之銘嘉此懿勳式金版玉璫之烈此證

大總統親授前國務總理唐紹儀勳一位證書

蓋聞休徵和會車書大一統之規禮重策勳惇典辨五章之等前總理唐紹儀業重金甌望隆玉玷艱難締造奠坤維釐戴之基畛域融和息乾野龍羣之戰爰溯大勳之集宜崇進位之褒本大總統依勳位令第一條親授勳一位以彰殊績受茲元祉協繡裳赤舄之儀嘉此懿勳式金版玉璫之烈此證

大總統親授前司法總長伍廷芳勳一位證書

蓋聞以德詔爵載在司士之書民功曰庸實著太常之籍前司法總長伍廷芳望重騫超文逾隨陸化戰爭爲揖讓信在片言由據亂進昇平功歸先覺凡茲勞勳宜有彰施本大總統依勳位令第一條親授勳一位以彰殊績受茲元祉同丹書白馬之盟蔚爲國楨式金版玉璫之烈此證

大總統親授陸軍總長段祺瑞勳一位證書

蓋聞凌烟圖畫垂褒鄂之英姿吉日攻同紀召方之偉績陸軍總長段祺瑞總攝師干翊扶民國周太尉志安漢祚軍懷左袒之忱管夷吾定霸齊邦民受一匡之賜爰佐大勳之集宜崇進位之褒本大總統依勳位令第